

Date – 26/03/2026

Time - 18:30 -18:40Hrs

AKASHVANI AIZAWL

REGIONAL NEWS BULLETIN

HEADLINES (EVENING)

1. Mizoram sorkarin tun thla ni 23 thleng khan sawhthing hralhna hmun tur bika ruahman SCC 64 zinga 14 atangin sawhthing kg nuai 16 chuang a hralh tawh.
2. Ni thum aw h tur Nghakuai Chiah Runpui 2026 chu Champhai Keilungliah ah vawiin khan hawn a ni .
3. Lungsen Aspirational Block a primary school thlan bika English bulthut zirna, ELF "Learn to Read" zirlaite'n English thiamna kawngah hma an sawn hle tih an Annual Report tihchhuahah tar lan a ni.
4. Petroleum & Natural Gas Ministry-in tuialhthei leh eirawngbawlna gas dinhmun a tha tih a sawi nawn.

<><><>

GINGER

Mizoram sorkarin tun thla ni 23 thleng khan sawhthing hralhna hmun tur bika ruahman Secondary Collection Centre (SCC) 64 zinga 14 atangin sawhthing kg nuai 16 sing 4 & 5,967 a hralh tawh.

Mizoram Agriculture Marketing Board (MAMB) co-chairman Dr. K.C. Lalmalsawmzauva hnen atanga Akashvani News Aizawl thudawn danin, thla hlui February ni 2 atanga support price awma kut hnathawktuten sawhthing an hralh theih hun chung tura ruahmanna kal mekah tun thla ni 23, Thawhtanni thleng khan sawhthing hralhna hmun tur bika ruahman SCC 64 zinga SCC 14 - Aibawk, Chawngtlai, Cherhlun, Hnahthial-I, Kanghmun, Khuangleng, Mamit, Reiek, Tawipui North 1, Thingdawl, Tipa, Tuidam, Tualcheng, leh West Phaileng atangin sawhthing kg 16,45,967 cheng nuai 510, sing 2, sang 5, 118 man hralh a ni tawh a. Heng SCC 14-ah hian sumdawngte chuan sawhthing hi kg khat cheng 30 atanga cheng 33 inkarin an lei a, sorkarin ba awm loa lei tura sumdawngte a tih angin sumdawngte hian an sawhthing leina man hi kut hnathawktute hnenah an pe vek tawh a ni.

MAMB-in support price awma sawhthing hralh theih hun tura a bituk chu February ni 2 atanga May ni 30 thleng a ni a; SCC 64-a sawhthing awm zat tura tarlan chu quintal nuai 3, sing 4 , 6,470 niin, tuna sumdawngten an lei tawh zat hi a vaiin quintal sing 1, 6,460 a ni.

Mizoram Sorkar chuan February ni 2 atang khan SCC katlangin loneitute Sawhthing lei tum mahse sumdawnngen kut hnathawktute sawhthing an leina man hniam ber tura a bituk, Reserve Price cheng 40 atanga 45 inkar chu, a san em avangin leitu tur an awm mai lova, February ni 9 khan Reserve Price chu cheng 30-35 inkarah tihniamin SCC pahnih- Mamit leh Tuidam atangin sawhthing te hi hralh chhuah chauh a ni.

<><><>

BASHINI APP

Sorkar laipuiin ram chhunga tawng hrang hrangte awlsam taka in hriat pawh zung zung theihna tura tawnglehna application a siam, Bashini-ah Mizo tawng telh turin hmalakna a kal chho mek.

Akashvani News Aizawl zawhna chhangin, ICT Informatics Officer Pu C Lalrinfela chuan Bhashini chu sorkar laipui hmalakna 'National Language Translation Mission' a ni a. Tunlai thiamna Artificial Intelligence (AI) nena tangkawpin India rama tawng hrang hrang te hmun leh hmuna lehlin theihna a ni a, tun dinhmuna he app hian hmun leh hmuna tawng 22 a let chhuak thei ani. Mizo tawng pawh telh ve tura hmalak niin, AI-in Mizo tawng a hriatthiam theih nan sorkar laipui chuan inelna siamin tun dinhmuna company 3- IIT Guwahati TawngTwister, Mizoram atangin- Mizomade leh MIZO AW te chuan inelna thawh 2-na an hmachhawn leh mek a, he app-ah hian Mizo tawng mumal leh dik taka leh tir theih an tum tih sawiin, ziaka tawng lehna Text to text translation hman theihin an buatsaih hmasa phawt ang a, zawi zawiin aw atanga tawng let thei, voice based lamah hma an la chho zel dawn a ti a, kuminah chuan engemaw ber chu a hman theih a beisei thu a sawi baw a ni.

Linguistic lama mi thiam Dr Laltleipuii chuan Digital khawvel anih tawh avangin Mizo tawng pawh AI-a luhpui a nih loh chuan a thi vat dawn a ti a, Mizotawng thuziak leh lam rik dan te chu AI-in a hriat thiam tur zawnga vawn that a pawimawh hle tih sawiin, AI model-in Mizo tawng dik taka a hriatthiam theih nan tawng lama mithiam bikte nen AI tana kaihhraina felfai tak siam a tul ani,ati.

Assembly Budget Session neih zawh takah khan ICT Minister Dr.Vanlalhlana chuan Al lamah hma an la chho mek tih sawiin, Mizoram sorkar chuan sorkar laipui siam Bashini app-a Mizo tawng dah ve turin Bashini app chu MoU a ziahpui tawh a ti a, he app hian hmun leh hmuna tawng 22 a let chhuak thei a, amah ngei pawhin a hmang tangkai hletih sawiin, he app-ah hian Mizo tawng dah ve turin Al bakah college leh university lama mithiamte nen tangkawpin chak takin hma an la mek ati a, nakum lamah chuan hman theih a nih a beisei thu a lo sawi tawh a ni.

<><><>

FISH FESTIVAL

Ni thum awh tur Nghakuai Chiah Runpui 2026 chu Champhai Keilungliah ah vawiin khan hawn a ni a, he hun hi District Fisheries Development Office leh Keilungliah Reservoir Management Committee tangkawp buatsaih a ni.

Hawna hun hi District Fisheries Development Officer Pi Lalremsangpui'n a kaihruai a, PHE EE Pu Jerome Lalremtluanga'n Keilungliaha hma lak dan hrang hrang leh tuikhuah chungchang te sawiin hun tha tak an hman a duhsak thu a sawi.

Mizoram Angling Association hotute pawhin thu sawiin Keilungliah tuikhuah ah sangha a tam thu leh a thuk viau avangin man erawh a harsat deuh an rin thu an sawi a, Champhai Keilungliah chu Angling Resort a nih theih an rin thu pawh sawiin, Keilungliah chu Mizoram hmun dang zawng aia remchang a nih avang leh tourist hip thei tak a nih avangin tun aia sawrkar pawhin ngaihven se an duh thu a sawi bawk.

Keilungliah Nghakuai chiah runpui a tel tur hian Mizoram hmun hrang hrang atangin nghakuai chiah thinte an kal khawm bakah a hmunah puanin kaih a riah chilh an awm bawk a, eitur leh inthiarna siam a ni a, Nghakuai lei tur a hmunah hian a awm bawk ani.

Nghakuai chiah runpui hi Inrinni khian khar a ni ang.

<><><>

PIB

Punjab leh Himachal Pradesh atanga Media mi 6-in Press Information Bureau buatsaihna hnuaiah Mizoram an rawn tlawh.

He Press Tour hi PIB Jalandhar-a Media & Communication officer, Vikram Jain-a'n kaihruaiin, Pathianni khan Mizoram an rawn thleng a, Mizoram hmun hrang hrang tlawh kualin, vawiin khan All India Radio station, Tuikhuahtlang an tlawh ani. Akashvani News Aizawl zawhna chhangin Team member zinga pakhat Prattek Jain chuan vawiin hi Mziorama an cham ni 4-na a ni tih sawiin, an rawn thlen tuk khan Sairang rel station an tlawh a, Sairang a rel rawn lut chu Mizoram leh Mizo mipuite tan sum leh pai dinhmun lama hmasawna lian tak thlentu a ni dawn a ti a. DIPR Mizoram leh MJA member te nen an inkawm bawk a, Mizorama lirthei tlan dan, Traffic rules mumal tak awm leh Mizo mipuite civic sense neih that zia an hmu chu entawntlak a tih thu a sawi a, nimin khan Thenzawl-a Thermal power plant an tlawh a, nature nghawng chhe si lovin ni khatah kawlpheha unit 40,000 a siam chhuak thei chu tha an tih thu a sawi a, Mizoram leh a chhunga chengte khawsakphung chungchang chu mi zawng zawngin an hriat ve tul an tih avangin North India-a chanchinbu hrang hrangah te an chhuah nghal tih a sawi bawk.

Mizoram tlawh a rawn zin Media mi 6 zinga 4 te chu Punjab mi niin, midang 2 chu Himachal Pradesh a mi an ni a, Inrinni hian Mizoram an chhuahsan ang.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Chanchinthar hi naktuk zing dar 7 leh a chanve-ah puan leh a ni ang.

<><><>

LUNGSEN ELF

Lunglei District-a Lungsen Aspirational Block chhunga primary school thlan bika English bulthut zirna, ELF "Learn to Read" English Literacy Programme hnuaiyah zirlaite'n English thiamna kawngah hma an sawn hle tih March 2026-a Annual Report tihchhuahah tar lan a ni.

Lunglei Deputy Commissioner Office, Disha Foundation leh ELF English-te tang ho hma lakna in nikum August thla khan he programme hi tan a ni a; sawrkar primary school 10 thlan chhuahah kalpui niin, zirlai 268-in an chhawr a. A tan tirhah zirlaite thiamna dinhmun endikna kalpui hmasak niin, chumi mil chuan pawl tina zir tur ruahman a ni a. Zirtirtute chu online training leh video kal tlangin naupangte zirtir dan tur zirtir hmasak an ni a. Zirlaite chu an tih chhinna tur lehkhabu pek an nih bakah, zirtirtute pawh zirtirnaa puitu hmanrua pek an ni bawk.

Kumin February thla khan naupangte hmasawn dan endikna, 'final assessment' buatsaih niin, ziaak) leh kaa chhang-in zirlaite'n endikna hi an hmachhawn a. ELF English team-te'n online-a zirlaite tanngkaa an kawmnaah zirlaite'n tanng thiamna, lam rik dan) leh inrin tawka kawngah hmasawna nasa tak an nei tih hmuh a ni.

A tir leh a tawpa zirlaite thiamna dinhmun khaikhinin hmasawna nasa tak hmuh a ni a. Thumal hriatnaah zirlaite thiamna chu zaa 25 atangin zaa 59-ah a pung a. Thu chang kim - sentence level- thiamnaah pawl 3 zirlaite'n zaa 18 atangin zaa 66-ah hmasawnin, pawl 4 zirlaite hmasawna chu zaa 13 atangin zaa 74-ah a kai bawk a. Zirlaite'n English chhiar, hriat thiam leh hrilhfiah kawngah pawh hma an sawn hle a ni.

He programme hlawhtlinavang hian Lunglei District Bawrhsap Pi Navneet Mann kaihhraina hnuaiyah, zirna kum thar 2026-27 lo awm turah sikul tam zawkah he English Literacy Programme hi kalpui chhonzawm tura ruahman a ni.

<><><>

PETROLEUM MINISTRY REITERATES

Petroleum & Natural Gas Ministry chuan tuialhthei leh eirawngbawlina gas-ah India dinhmun a tha tih sawi nawnin petrol, diesel leh eirawngbawlina gas hralh chhuahna-ten hralh chhuah tur an ngah tawk vek a ni, a ti a, ramchhung mipuite chu thu diklo theh darh awm thin avanga phili buai mai thin lo turin a ngen bawk.

Vawiin lamah ram 41 vel atangin tuialhthei thlitfim loh thahnem tak India-in a dawn leh tih Ministry chuan sawiin India rama tuialhthei thlit fimna zawng zawngte chuan zaa za chuang hna an thawk reng a ni, a ti a, eirawngbawlina gas-ah pawh tun dinhmunah hlauhthawna tur a awmlo, a ti bawk.